

**Umiarsualivimmiinnermut akileraarutit pillugit Inatsisartut inatsisaata
allanngortinnera pillugu Inatsisartut inatsisissaannut siunnersuut (Umiarsuarni
takornarianik angallassisuni ilaasut akileraarutaannik atuutilersitseqqinneq)
Aningaasaqarnermut Akileraartarnermullu Naalakkersuisumit saqqummiunneqartoq**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Mariia Simonsen, Inuit Ataqatigiit
Inatsisartunut ilaasortaq Kuno Fencker, Siumut
Inatsisartunut ilaasortaq Karl Tobiassen, Siumut
Inatsisartunut ilaasortaq Jens Napaattoq, Naleraq, Knud Mathiassenimut sinniisoq, Attaviitsoq

UKA 2023-mi ulloq 3. oktober 2023 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

2023-mut aningaasanut inatsit pillugu isumaqatigiissummut atatillugu siunnersuut saqqummiunneqarpoq, tamatumani umiarsuarni takornarianik angallassisuni ilaasut akileraarutaannik atuutilersitseqqinnissaq partiit isumaqatigiissutigimmassuk. Umiarsuarni takornarianik angallassisuni ilaasut akileraarutaat umiarsuit Kalaallit Nunaanni umiarsualivimmut tulannerit umiarsualiviilluunniit avataanni kisarnerit tamaasa umiarsuarmi ilaasut amerlassusiat tunngavigalugit akilerneqartassasoq siunnersuutikkut matumuunakkut peqqussutigineqarpoq. Taa-maalillunilu siunnersuut ilaasunut siusinnerusukkat akitsuutigitinneqartumut, umiarsuarmik takornariartaammut ilaasunut ataatsimoortumik akitsuutaasumut, sanilliulluni allaaneruvoq. Tamatuma saniatigut siunnersuutigineqarpoq umiarsuit takornariartaatit angisuut umiarsualivimmiinnerminni akitsuutaat (SIKUKI Nuuk Harbour A/S minillugu) marloriaa-

tinggortinneqassasoq aammalu avatangiisinut aserfallatsaaliuinemullu akitsuummik nutaamik kommuninut tuttussamik eqqussisoqassasoq.

2. Siunnersuutip Inatsisartunit siullermeerneqarnera

Siullermeerinninnermi annertuumik oqallittoqaraluartoq siunnersuut nalinginnaasumik taper-serneqarpoq. Oqallinneq ilaatigut akitsuutip sumut atorneqarnissaanut tunngatillugu suut pingaarnersiorneqarnissaannut kiisalu qanoq annertussuseqarnissaanut tunngavoq. Tamannalu tunngavigalugu siunnersuut Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

3. Tusarniaanermut akissutit

Tusarniaanermut akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq. Tassani allassimavoq siunnersuut piffissami 2023-mi 1. junimit 29. junimut tusarniaassutigineqarsimasoq. Tusarniaanermut akissutit tiguneqartut siunnersuummut nassuiaatini allaaserineqarput.

4. Saaffiginnissutit

Ulloq 25. september ataatsimiititaliaq siunnersuummut tunngatillugu AECO-mit (Association of Arctic Expedition Cruise Operators) saaffiginnissummik tigusaqarpoq. Saaffiginnissut isumaliutissiissummut **ilanngussatut** ilanngunneqarpoq.

5. Aningaasaqarnermut Akileraartarnermullu Naalakkersuisup ilisimatitsiffiusumik ataatsimeeqatiginera

Siunnersuutit ataatsimiititaliamut aammalu Naalakkersuisut suliaqqarfiinut ataatsimut attuumassuteqartut pillugit Aningaasaqarnermut Akileraartarnermullu Naalakkersuisoq ataatsimiititaliamit ilisimatitsiffiusumik ataatsimeeqatigineqarpoq. Siunnersuutit taakku ilusili-gaanerannik saqqummiussinnermi siunnersuut matumani pineqartoq ilaavoq.

6. Siunnersuutit

Ataatsimiititaliap siunnersuummik suliarinninnerani atugassatut kisitsisitigut paasissutissat Aningaasaqarnermut Akileraartarnermullu Naalakkersuisumut ataatsimiititaliamit ujjartorneqarput. Ataatsimiititaliap allagaa aammalu Aningaasaqarnermut Akileraartarnermullu Naalakkersuisup akissutaa isumaliutissiissummut matumunnga ilanngussatut ilanngunneqarput.

7. Siunnersuutip aappassaaneernejarneranut Naalakkersuisut allannguutissatut siunnersuutaat

Siunnersuutip aappassaaneernejarneranut Naalakkersuisut allannguutissatut siunnersuutaat ulloq 18. oktober tiguneqarpoq. Allannguutissatut siunnersuummut nalinginnaasumik nassuiaatini Naalakkersuisut nassuiaatigaat, allannguutissatut siunnersuutip siunertarigaa inatsi-

siliorderup erseqqinnerulersinneqarnissaa akileraaruseriffimmut inatsimmi tunngavissamik immikkut ilanngussinikkut.

8. Ataatsimiititaliap siunnersuummik suliarinninnera

Umiarsuarnut takornariartaatinut ilaasunut akitsuutip atuutilerseqqinneqarnissaanik siunnersuut nalinginnaasumik taparserneqartoq ataatsimiititaliamit maluginiarneqarpoq.

Kommunit avatangiisinut aserfallatsaaliuinemullu akiliisitsinissamut periarfissinneqarnerat ataatsimiititaliamit pitsaasutut isigineqarpoq. Tamatumanili akitsuummik allaffissornikkut aqutsinerup kommuninut pisariaqanngitsumik artukkarsuutaannginnissaa isiginiarneqassaaq.

Umiarsuarnik takornariartaatinik takornariarnerup takornariaatsinit allanit allaanerunera ataatsimiititaliap suliarinninnermini pingaartissimavaa, tassami taakkunannga angalasut nunami unnuinernik nerisaqarnernilluunniit taama annertutigisumik atuineq ajormata. Taamaattumillu umiarsuarnik takornariartaatinik takornariat nunamiinnermini akitsuuserneqarnerat pissusissamisoorutut ataatsimiititaliamit isigineqarpoq. Tamatuma saniatigut sumiiffinnik attuumassutilinnik kommunit namminneq toqqaasarnissaat aammalu aserfallatsaaliinermut tunngatillugu akiliutissamik aalajangersaasarnissaat naapertuuttutut ataatsimiititaliamit isigineqarpoq.

Takornariaqarnerup imminut napatinnissaata pingaaruteqarnera, tassungalu ilanngullugu avatangiisit najukkanilu piniariarfiit umiarsuit takornariartaatit najuunnerannik sunnerneqanngitsoorsinnaanngitsut, partiinit arlalinnit erseqqissaatigineqarmat ataatsimiititaliamit maluginiarneqarpoq. Tassunga atatillugu siullermeerinninneq ataatsimiititaliamit innersuusutigineqassaaq, tamatumani ikummatissat kinertut (heavy fuel oil) atorunnaarsikkiartuaarneqarsinnaanerannik partiit arlallit kissaataat tusaatissatut tiguneqartoq Aningaasaqarnermut Akileraartarnermullu Naalakkarsuisup naggasiinnermini oqaatigaa.

Kiisalu ataatsimiititaliap paasinninnera malillugu umiarsuarnut takornariartaatinut ilaasunut akitsuusiineq takornariallu amerlanerunissaannik kissaateqarneq oqimaaqatigiissinneqassapput, tamatumalu peqatigisaanik avatangiisit kiisalu najukkani najugaqartut inuussutissarsiortullu isiginiarneqassallutik.

Tamanna tunngavigalugu umiarsuarnut takornariartaatinut ilaasunut akitsuutip ingerlaavartumik iluarsiiisuteqarfigineqartarnissaanik Naalakkarsuisut peqquneqarsinnaanerannut periarfissaq, taamaalillunilu ingerlataqarfimmi ineriartorneq malillugu akitsuutiniq eqaannerusumik naleqqussaasinnaanerup anguneqarsinnaaneranut periarfissaq, ataatsimiititaliamit oqaluuserineqarpoq. Tassunga atillugu taamatut ingerlaavartumik eqaannerusumillu iluarsiiisuteqartarneq qanoq pisinnaanersoq Naalakkarsuisut aappasaaneerinninnissamut akissuteqaammini isummerfigissagaat ataatsimiititaliamit kissaatigineqarpoq.

Tamatuma peqatigisaanik umiarsuarnut takornariartaatinut ilaasut akileraarutaannik inatsimmi aalajangersakkap ingerlaavartumik eqaannerusumillu allanngortinneqarsinnaanerannik qulak-

keerinnittumik siunnersuutip pingajussaaneerseqarnissaanut allannguutissatut siunnersuummik saqqummiusseqqullugit Naalakkersuisut ataatsimiititaliamit kaammattorneqassapput. Tamanna pisinnaavoq umiarsuarnut takornariartaatinut ilaasunut akitsuutigitinneqartup allanngortinneqarnissaanik aningaasanut inatsisini ukiumoortuni Naalakkersuisut siunnersuuteqarnissamut periarfissinneqarnerisigut.

9. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini allaaserineqarput. Ataatsimiititaliaq tamatumunnga annertunerusumik oqaaseqaatissaqanngilaq.

10. Ataatsimiititaliap inassuteqaatai

Tamanna tunngavigalugu allannguutissatut siunnersuut **akuerineqassasoq ataatsimiititaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Asii Chemnitz Narup
Siulittaasoq

Jens-Frederik Nielsen

Peter Olsen

Mariia Simonsen

Kuno Fencker

Karl Tobiassen

Jens Napaattoq